

四庫全書

集部

欽定四庫全書

稿文堂集卷十三

宋 慕容彦逢 撰

書

投獻書

某聞君子之於天下非才之難也所以將之者難才出  
天而寓於性聰明智謀皆自是出舉而措諸事業無不  
可者然無以將之則居勢利必爭履危難必懾聞毀譽必  
亂處疑似必惑之人也方且逐事物於無所終窮雖才

之有餘必困躓顛隳而後已故君子之用才昭之以識  
作之以氣而持之以德識以照之孰能蔽之氣以作之  
孰能禦之德以持之孰能搖之三者合併而後其為度  
也大故其為志也固度遠而志剛故誘之以勢利而不  
淫迫之以危難而不懼鼓之以毀譽而不移委之以疑似  
而不眩夫然後與萬物相偶而莫之能撓以心役萬物  
而不為物所役故將有為也足以盡已之才巖穴之思  
廟堂之議其所著見雖不同要之窮不失義達不離道

俾名教與天壤相終夫豈小哉故君子之度猶之海也  
望之不極即之不測故撓之不濁靜之不澄酌之不損  
增之不盈蛟龍聚焉風雲興焉彼潢汙行潦之水朝滿  
夕涸亦何能自致於此古之大有為於世者雖才之不  
可及然必有非常之度伊尹之耕傳說之築太公望之  
漁非不貧且賤也而不以為戚一旦舉而用之輔相人  
主而不以為泰其所養有大過人者故所建立若此其  
盛也推而下之凡以德業自進者莫不然西漢賈誼號

為多才一不得志悲憤以死蓋有其才而無其度也閣  
下負天下名二十有餘年出入中外視後進與同升之  
在已上者而志不動顧先進與同升之在已下者而志  
不矜恢然有容毅然自守其讀書見古人若此猶忻慕  
之況與閣下並時又曩昔南宮奏名出自衡鑒今者以  
主生之禮求見左右閣下念某之勤恕某之狂一與之  
進不勝幸甚

又

某曩者天幸屢獲拜見辱下執事接之之顏甚溫誘之  
之辭甚詳執事之獎引後進亦已至矣是時某憂制方  
關心氣未寧不獲有請於左右某幼好讀書及長益勤  
不愧躡等緬想古人之所聞而欲盡得之迺究觀經史  
諸子百家之言雖貪多務得不間精粗而性質頗蒙過  
目輒忘獨於古人議論施設之際與夫成敗興衰之由  
有激於心不能自已或沉吟深思或研味餘意或躍然  
自喜或惘然自失或可嗟可怨可為太息或可惡可怒

可為填膺意不自已則發於聲聲之不足則紀之以文  
故自卅角以來家無兼日之儲而不知以為貧窮居閭  
閻而不知以為賤開卷有得足以自適舉在外者皆無足  
以累此戊辰年春執事不以某不才備數奏籍獲齒官  
學今者為貧竊祿猥佐一縣乃釋向之所樂以從事乎  
俗簿領盈几文檄繼踵目覩手握米鹽瑣細進欲自拔  
於流俗而不能退欲翻然引去而不可檢身自潔與衆  
異趣則謗誹讒譖不約而會違已從衆與之無忤枉尋

直尺所學非是將求執事一言以破所惑惟執事幸教之將書諸紳以朝夕從事焉僭易之罪伏冀矜恕

又

某碌碌晚進猥佐小邑沉迷吏役齷齪與轅下駒無以異也迺不自揆獻書下執事夫豈徒然哉竊自惟天下之才天賦之可謂艱矣而天下用之未必盡也夫有周物之智而用之不盡則有餘謀有過人之能而用之不盡則有餘技謀技有餘功業不極此有志之士所以激昂



深悼不能自已也蓋士之仕也豈徒干祿而已固將有  
為也使之掛冠不出遁逃山林枕石漱流與麋鹿俱彼  
復肯念此哉既投迹有為之地欲自見於世迺無路以  
進求進而耻於自鬻雖甘心於自鬻而時未必售故士  
之有才者又以獲用於世為難也猶蠅飛不出牆宇附  
隼翼可以冲天蟻行不離步武得驥尾可以追風閭巷  
之士勢卑力弱非有所託不能自致於青雲之上古人  
之於晚進或倒屣以迎或下榻以延或比之古人或自

以為不及嘖笑聲效為之品題而聲價自定彼豈邀譽  
於時求德於所知而然哉蓋惟仁者為能進所知惟智  
者為能知所進仁智君子之所盡心焉觀古人之名卿  
相必有知人進賢之德使當時薦紳瞻望一眄以為輕  
重而後世想見風采恨不與之同時中間持祿患失避嫌  
遠謗無所薦拔自同寒蟬者不獨當時嗤鄙而史官譏  
貶後人詆訶臧文仲聖人以為竊位虞丘子婦人以為  
不忠指議所及百世之下不可磨滅顧不重歟雖然古

人之知人大率以言孔子曰不知言無以知人也蓋言  
心聲也言之所鄉志之所在孔子之門人非不日見之  
也而謂二三子盍各言爾志雖曰失之宰予猶堯之於  
鯀子產之於校人非智有所不及顧逆詐之非道也彼  
少正卯鄧析非不偽而辨蘇秦張儀非不巧於說騶衍  
公孫龍非不工於誕彼豈不欲文過飾非攘天下之美  
而有之而下流惡名欲蓋益著者理義之不可誣也故  
所謂知言者非多言之為美亦非寡言之為貴或以言

得之或以默得之可以意會而不可以言傳此古人之  
妙也某竊觀執事以文學德誼負天下名二十有餘年  
回翔所至品題士類甄別精確取信天下某筮仕之初  
獲備屬吏瞻望履舄顧不幸歟雖然如某之愚何足以  
進見於下執事然竊自惟某幼承義方之訓妄有志於  
于學半塗為貧竊祿從官進欲深造而不能退顧碌碌  
者而耻之深念某之所賦尚可進邪抑不足教也而惜  
然不能自測今者請命典謁以質所惑閣下以默知人

則不待某言較然判矣如以言則某之書可見矣幸閣下少留意焉

謝人書

某頓首再拜某官伏承執事不以某不肖遠貺手筆叙三代以上君子致身從道之方下及漢唐諸子且勉某以所輕重大率先遠者大者而近者小者無取焉某性質頗蒙雖不足議此而樂聞之誠願學之意猶之稚子而遇希世之寶目睹手握不能名之而知喜之雖知喜

之不敢有之夫三代而上天下之士去古為近離道未  
遠君上之所率迪庠序之所教養父子兄弟比閭族黨  
之相與言以本勝末重內輕外氣完而不挫是以度量  
恢廓志操端潔見識高明後世去古益遠士氣衰弱能  
不待文王而興者謂之豪傑之士孔孟既歿微言奧義  
泯滅幾盡戰國之風操捍闔之術演從衡之說身委勢  
權死而無悔故士日趨於詐西漢以奔競相高朝奏尺  
牘暮被召命天子歎息恨相見之晚故士日趨於矜東

漢以隱居放言為高屢聘不就為廉刻意矯情甘足枯槁故士日趨於僻兩晉而降質幹戕盡枝葉彫零謂能談諧為風流外形骸為曠達故士以浮華相耀譎怪駭俗唐有天下三百年士風幾類西漢然文雅醞藉不及漢遠矣下及五代廉耻道消不足比數嗚呼千數百年間如董仲舒賈誼揚雄王通韓愈之徒雖卓然自拔於時然以古義責備猶不得為完人況夫他哉夫古今殊時名實寢紊昔孔文子敏而好學不耻下問孔子以為

丈顏淵不遷怒不貳過孔子以為好學今綜緝辭采則  
曰吾斯之謂文涉獵載籍則曰吾斯之為學豈孔子之  
所謂文學也哉某雖不敏考古論今有激於衷而下執  
事又幸獲教之敢不夙夜黽勉庶幾小人之棄君子之  
歸乎至於古人去就輕重之理皆執事自得於胸中者  
某恭聞命矣不宣某再拜

謝人書

某幼嗜學問稍長以博綜自喜貪多務得欲兼古人之



聞而有之惑於疑似戰於予奪如航大海罔識涯涘然不自以為非也伏承長丈特貺金玉之音俾先六經孔孟之學後子史傳說之言屏去異端之害道某始聞之而懼中得之而喜以謂擇之不慎思之不精汎濫之學幾不免為陋儒此某之所以懼也然以六經孔孟為權衡而諸子百家無所逃於輕重以六經孔孟為繩墨而諸子百家無所逃於曲直故言雖殺亂而折衷於聖習雖支離而統一於道夫亦何慊於博乎嗚呼六經孔孟猶日

月之明衆星嚙嚙之光不足觀也猶雷霆之聲衆喙冥  
冥之音不足聽也日月之明而瞽者不得見雷霆之聲  
而聾者不得聞彼舍六經孔孟之學而曰多見多聞將  
焉用之某自今以往當研精覃思推原六經孔孟之書  
以求先聖之用心以之治身以之事親以之事君必有  
以副執事諄誨之勤更冀終始成就之

論文書

某欽服高誼請命典謁執事愍茲區區見之甚數接之甚

溫又於廣坐中過譽某之文竊自惟蠢蠢晚進無聞於時  
何足為下執事道者而樂善之誠動於顏色形於話言有  
意羽翼之使騰躍而上也然則大人君子之所存可知矣某  
聞之士伸於知己者而屈於不知己者某雖不足以言文然  
執事許之試為執事論之夫文章自古為難非為之難也  
知之難矣非知之難也得之難矣非得之難自得之難矣  
古之人無意於文或以明道或以叙事以為默則不足以  
自達則宣之以言言必有紀則述之以文故古人之文渾然

天成固有凝滯猶渾金璞玉不見有追琢之跡後世不然務華者以侈靡為麗務巧者以雕刻為工務怪者以險僻為高務豪者以馳騁為壯各揣所好互相標目其不淪於俗者蓋無幾也故斯文陵夷無復古人之盛孔子之門人顏回亞聖而文章不少見孟子著書七篇貫穿古昔上下數千百年而曰距楊墨放淫辭予豈好辯哉予不得已也故古之人可以無言則文與之俱熄有感於物而言則文與之從事焉緣督而言因言而文此古君子所以異於後世

也某以為文之要如此是耶非耶下執事幸教之

請益書

某生長陽羨與執事同里雖門宇相望而前此未有承教之幸每缺然不饜於心今者不待請見千里獻書非有他求也竊自念某意讀書究觀經史諸子百家之言細大不捐必欲盡得古人之所聞以故博而寡要雜擾並進方且惑於疑似戰於予奪如立九達之衢而未知適從輒懷古人愛日之意冀得亟聞緒言以豁蒙鄙此某區區之懇也

其聞之聖人之經有六而性命道德典章法度乃至天地鬼神萬物之理罔不畢具如大海水波濤起伏蛟龍出沒珍怪隱見廣博無涘淵深不測天變地化涵蓄萬狀又如寶肆望之粲然即之眩然有循牆而不得見者矣有窺見而不能盡者矣有寘諸掌握而不能名之者矣自孔子孟軻沒後微言既息奧義不彰而諸儒人自名家貶黜所異乃至父子有不同之論師生有相誚之辭中間不移於流俗者蓋無幾也夫三代而上仁義禮樂之澤日以沾漬士

大夫浩然之氣擴於所養世人所謂學者凡事親守身應物從政遠者近者小者大者無非學也凡立言以明理為文以紀言從容自得咸與道會或累千萬言而不為辨或終身無所見而不為訥後世士失所養學棄本真區區口耳之習務投時好至謂取青紫為明經術之效豈不謬哉是以士大夫心與言相違言又與道相戾而古人之大體不復見矣子路曰何必讀書然後為學子曰有顏回者好學不遷怒不貳過嗚呼彼去孔子之所謂學何遠耶某雖

不敏尚論古之人竊有志焉而未聞承學之要執事與鄉里甚厚而貧家又忝葭莩之末或蒙不棄賁以諄誨俾適正審是不迷於多方某之佩德曷有窮已不宣某再拜

啟

謝教官啟

班級雖卑報稱攸重載循譴陋伏積兢慙竊惟先皇帝躬上聖之姿超百王之右體元用妙明闡幽深惟風化之大原尤以膠庠為先務崇尚經術尊寵師儒增諸生



之員創三舍之法下逮泮水咸建學宮雲漢為章皇矣  
作人之運規矩厥步靡然承學之流萬邦作孚一變至  
道暨今聖總攬之始念神考在宥之隆克監成憲於先  
王以治建邦之學政支起傾厦遏迴狂瀾聿興斯文駿  
惠大業凡覩雲龍之作復見天地之純豈繁荒踈濫居  
教導如某學問不足以窺聖賢之奧辭章不足以暢理  
義之微初非語上之資徒有好高之志特以聖世育才  
之廣先人教子之勤幼而讀書幾不知弄謬當弱齒偶

玷榮科屬試麗詞薦塵異選方仰斗升之給敢辭簿領之  
勞不圖恩波俾依聖仞祿廩可以奉親養經籍可以味道腴  
優游在公顧何殊於吏隱詰屈難因第有愧於師嚴此  
蓋伏遇某官為時真儒秉國大政茂贊乾坤之神富赫  
增日月之光明博求俊良靡問幽賤借齒牙至公之清  
議欲俎豆不肖於俊游幹寒谷之孤根鼓朝陽之嘉律  
馴致僥倖獲被寵休某敢不遜志慎思砥節礪行數學  
相長竊慕於前聞功名可為肯忘於異日

改官謝啟

帝閣引籍選部奏名邁足華紳欣雲天之在望脫身冗  
調幸綸綍之親聞豈謂孱微有茲叨沐伏念某奮身寒  
遠遭時盛明輕尺璧而貴寸陰雖云有志持千金而享  
敝帚殆不自量惟義命已決於胸中故窮通悉捐於度  
外為貧干祿以仕代耕初繇經術之科效官簿領迨玷  
藝文之選備數類林爰暨更書猥塵薦格偶逃官謗輒  
與明聞朝著乍趨有小臣違顏之感臚傳驟及如當年

唱第之儀仰冒隆恩靡安愚分此蓋伏遇某官廓包荒  
之度推樂善之誠品題一鄉夙借汝南之月旦楷模多士  
幸登元禮之龍門實賴譽言獲階榮路氣回黍谷方資春  
律之和海接星潢更假秋槎之便過此以往未知所裁

謝試中宏詞啟

試詞伊肇方搜穎出之才獻藝匪工猥被鼎新之選拜  
恩優渥揣分戰兢竊惟斯文盛衰與道升降五帝而上  
載籍蓋靡詳焉三王以還典章顧可考矣暨戰國干戈

之擾及暴秦煨燼之災異端並起如蜂精義不絕如綫  
操觚之士雕蟲是師景差宋玉唱於前枚乘鄒陽應於  
後務豪則推嵩岱喜怪則窮蛇牛競巧則較鎔銖紛華  
則繡鞶輓雖賈誼節之以禮揚雄戒夫不為而氣力不  
足以回狂瀾故支撐不足以起大廈由漢及魏浸淫迄  
於六朝更隋與唐敗壞極於五代中間若建安之稱麗  
作正始之指名流咸高冗長之辭無復中和之氣乃有  
不出月露之習相變宮羽之談或擊鉢責程或探囊按

部或成章於七步或積思以十年率意者流離於口占  
湛思者妥帖於腹藁宏衍若張衡而以言艱為病敏捷  
如任昉而才盡見譏異軌同奔去本益遠如孤峯絕  
岼者施之廊廟則駭如麗服艷粧者類之風雅則乖振  
葉討源盡掃彝倫之正沉辭浮藻徒滋誇競之風間有  
自奮而不移抑亦可數者無幾我朝鑒積世造士之弊  
先帝承累聖復古之心登用儒臣緝明教典聿興經術  
之學斥去聲病之科煥乎人文一變至道淵然神化百

聖不慙尚念應用之詞乃有設科之意迄今上之總政  
追神考之作人爰建新科以述前志昭示古今之體詳求  
辭理之優創置攸初勸率甚厚上意所注衆指為榮紛  
如簪裾縉爾翰墨或握靈珠以自謂或賤良驥而不珍  
豈容孱姿濫塵異擢伏念某學惟自信才不逮人補苴  
徒勞而少功獲落頗譏於無用檢身慎行初不求於世  
知聞禮言詩蓋第遵於家訓青氈惟舊白雲無心享敝  
帚以千金雖非審已漱芳潤於六藝聊可怡情謬當弱

齡亟玷榮第斗升既竊於甘旨簿領敢殫於劬勞退食  
自公開卷有得樂分不競隨處而安勉試詞場實慰倚  
門之望爭先俊域退慙應敵之難偶茲褒甄出於僥倖  
此蓋伏遇某官命世英輔覺民真儒以道佐王為時顧  
俊謂凡馬既收則良馬必至謂假龍既好則真龍乃來  
容茲一日之長備於五人之列某敢不冰蘖勵節葵藿  
傾心許國之誠拳拳於忠義致君之業勉勉於猷為上  
副穆清次酬獎拔過此以往未知所裁



謝中書舍人啟

程篇甫上愧文采之不工恩典驟加驚寵靈之非據伏  
念某行能卑陋術業空疎預登經籍之科浸被師儒之  
選曩緣甄錄辱賜燕閒因誤褒嘉獲參讎校旋塵憲府  
繼陟諫垣俱莫效於涓埃顧徒糜於餼廩幸逃瘵曠初  
載筆於螭坳敢玷高華遂代言於綸掖矧神聖述作之  
御方天人和同之時五星之軌循行諸福之物類至法良  
意美吏更惟謹於持循民阜俗康邦已臻於熙靖赫茲盛

際光於古初是宜深厚之訓詞克副休明之文物於焉  
循省豈不叨踰此蓋伏遇門下僕射相公業廣功崇道  
隆德峻齒牙餘論必慎擇於正人廊廟除書肆允諧於  
清議施及寒微之跡猥深特達之知師席振衣曾乏趨  
承之舊相門推轂實居薦引之先假以要途寔諸法從  
積此銘藏之素罔知報稱之方敢不勤恪以赴事為靖  
共以安分義退免譴呵之及進惟驅策之從過此以還  
未知所措

回謝黃學士啟

伏審奉如綽之溫文擢登瀛之華序傾馳有素欣慰交深  
惟自昔讎校之資乃諸儒涵養之地蟬別簡蠹芸披裘  
香映扣閣之青藜嘗聞往謀詠當階之紅藥多出此塗  
某官學逢左右之源文得中和之氣揚芬黌舍策足俊  
屨陪藏室之游名已書於藻籍垂置郵之問銜初覩於  
冰條雖高誼之曲敦豈微蹤之敢冀永言欽佩罔喻誠  
悰

汝州到任謝兩府啟

自貽罪戾宜正典刑尚玷朝恩俾分郡寄退循僥倖愈  
劇怔營伏念某家本羈單最為孤進仕安卑冗曾乏能  
稱遭遇聖明搜揚疏遠偶預擢序寢階清華自忝從臣  
迨今八載再直詞掖兩貳省曹陪經幄之後塵參禮司  
之末議迄無一得以效萬分惟是顓愚僅守區區之小  
諒至於兢慎每懷惴惴之私憂顧智無先見之幾而罷  
有易盈之誚上孤任使亟致顛隳伏遇門下僕射相公

德度有容仁心不忍念茲寒跡舊出高閤秋賦掄才初  
備糊名之選晨朝接武久聯持橐之班深惻慈憐特垂  
善救終賴保全之力遂寬竄殛之刑恩比丘山雖銘肌  
而曷報心非木石豈感涕之無從

又啟

伏遇某官德度有容仁心不忍過私寒跡俾出高閤遙  
羽鴈鷺之班初由獎借脫身風波之險每賴保全茲尤  
惻於慈憐用特垂於善救屬言章之薦至方公議之弗

容終賴緒言得寬遠殛心非木石豈感涕之無從恩比  
丘山雖銘肌而曷報

復修撰謝兩府啟

右某伏奉告命復集賢殿修撰者省愆夙夜方懼怔營  
肆宥臣民與膺滄滌綸言俯逮雨涕交揮伏念某出本  
衡茅進由雕泮偶承人乏寢誤聖知陪鵷鷺侍從之班  
遙帷幄論恩之列寵私未報歲月滋多緬想厥初敢越  
巢林之分叨塵迺爾顧無橫草之勞唯求退藏冀甘孤

拙暨積愆之既著匪公議之可容尚賴廷僉照知本末  
特寬朝憲俾竊便安茲因解澤之施俄復書林之選涵  
濡為渥報稱尤難此蓋伏遇某官本仁恕以翼贊大猷  
崇忠厚以表率庶俗凡士夫之小善罔或遐遺矧門館  
之舊遊倍加慈惻肆蒙甄叙出自記存某敢不益恪慎  
官箴虔共吏治失之已往雖永咎何以追收之將來尚  
不辜於所學

復修撰謝本監司啟

伏念某迹孤地寒材薄能淺猥承人之寢誤聖知陪鵷  
鷺侍從之班造帷幄論思之列稽勞無補閱歲滋多逮  
積釁之既彰匪常刑之可貸分符汝海已出優恩列職  
書林復叨甄叙此蓋伏遇某官用心平恕操術仁慈加  
問孱微曲垂休庇俾脫鰥曠獲冒深恩

回謝新知汝州王大夫啟

講聞風誼積有歲時比奉更書獲承除命方修竿牘之  
問庶展腹心之誠豈謂勞謙先貽芳訊撫存良厚感悚



交深伏惟某官蘊識高明賦材闕廓任更中外著古人  
經國之猷事歷險易挺志士危軀之節用孚賢業自結  
主知某養拙此邦迨經累月及瓜受代雖屈指而尚遙  
颺輶居前每捫心而自愧未諧參晤正切傾馳冀順節  
宣益隆祉福

回謝貢士樂僊樂傳啟

伏審上舍先輩較藝儒林策名貢籍周鄉論秀與聞造  
士之方漢郡觀能竊有得人之幸辱迂華轡仍貺長綫

諒修桑梓之恭豈責瓊瑤之報聊塵謝幅并展賀儀伏  
冀隆私特垂深察

與本路安撫鄧資政啟

右某迹遠門牆念數更於歲籥誠陳竿牘冀仰答於台  
躔恭惟某官氣稟山川辰逢旦暮奮揚賢業翊贊政機  
若時鹽梅用克和於鼎寶為國柱石方永弼於邦基時  
近嚴宸升華秘殿西都守鑰曩顧重於師瞻中宁賜環  
行復登於柄任某羈孤寡與樸拙多違自拜車塵已周

星紀橫經學省嘗先左右之容接武從班每借齒牙之  
論逮有陶鑄尤辱記憐收錄於瓏丘待盡之餘保全於  
風波幾覆之際雖懷銘感曷報恩私茲假邦麾實居率  
部坐縻符印阻屬橐鞬徒頌祝之交深非名言之可既

寄江寧安撫啟

已擇剛辰肇開雄府伏惟慶慰恭以某官道深造而自  
得氣直養而至剛謀合唐虞之都俞文追商周之訓誥  
闡揚六藝時之醇儒贊翼九重邦之元老比從懇請暫

即便安民瞻愈傾公論胥鄉四牡奕奕佇觀入覲之儀  
八鸞啗啗將邁遄歸之頌某戴恩素厚圖報未能祝頌  
併勤名言曷既

冬至賀啟

氣應律鍾茲謂物生之始晷移星陸共欣日至之長伏  
惟某官業履瑞時材猷經國風望顯於中外詠歌流於  
士民方穀旦之載臨宜繁禧之並集某坐縻符竹阻造  
門牆顧叙慶之靡遑在馳情而曷已

賀正啟

四氣播時三朝啟朔陽居震而萌動物前寅而亨通伏  
惟某官重德鎮浮嘉猷經遠以忠恪享上之實興慈仁  
澤物之功當品彙之咸亨宜福祥之並集某方縻符印  
阻望門牆徒虔慶牘之馳莫預壽觴之薦

賀館職到任啟

右某伏審奉綈檢之溫文進蘭臺之清貫竊惟慶慰恭  
以某官早席問望自結眷知映扣閣之青藜暫勞是正

詠當階之紅藥行被詳延特詣高軒并攜大軸辱謙冲  
而過禮顧感悚以交懷

賀曹運判就遷副使啟

恭審就頒恩制擢正使名凡在統臨胥同慶慰伏惟某  
官深忠許國遠業映時材適變通顧何施而不可政先  
豈弟宜所蒞之有聲用結眷知進膺褒寵乘輶劇部暫  
資均節之謀遙羽華塗行著論思之効

賀本路監司到任啟

伏審輶車臨部轂旦視章初奉使移已虔遵於條教坐  
縻郡紆阻竊望於光儀敢叙悃誠遠馳慶牘伏惟某官  
風猷華國業履瑞時材兼文武之全無施不可政得中  
和之樂所蒞有聲用結眷知遂膺臨遣外臺刺舉暫為  
揚歷之階前席論思別近詳延之寵

跋

跋僧懷素帖

歐陽文忠公稱魏晉法帖初非用意自然可喜後人以

學書為事業如懷素之徒疲弊精神不以為苦然六藝  
未有不學而工者魏晉書體皆有師承以意在筆前為  
法文忠不喜學書故詆之若此懷素行筆頗類羊欣梁武  
帝亦以欣終不似真云辛卯重九日題

跋李伯時馬

杜工部稱韓幹馬能窮殊相而畫肉不畫骨獨曹將軍  
為盡善予觀二人遺蹟信然伯時筆法蓋得於曹韓士  
大夫寶之為神品觀於通真西軒丙戌三月



題道錄黃大中書軸


某自崇寧癸未以中書舍人扈蹕迄今十有四年又間緣祠事詣醴泉者不可勝記雖屢見淵靜冲和師曾不少欵政和丙申七月戊午始得造琴軒清談終日慰懌可量

題遺教經後

汝之後圃有山池水竹之勝此刻在圃之西小亭沿灘溜度危約穿叢葦乃至見此默想舊游如在目前云

題青城瑞石文後

政和五年三月癸巳上御集英殿第多士名近臣侍內  
出青城山瑞石尖圓黑色大如百斤秤錘有白文在石  
曰呂公天與之道急急呂公之行凡三十有三分兩  
行石脉透徹文仄旁見字法比王右軍尤加清逸臣某  
與觀并賜模本得以寶藏豈不榮幸模本止得十之七  
八蓋石理溫潤字字精采殆若飛動非模刻所能盡也  
具位臣姓某謹題



欽定四庫全書

集部

稿文堂集卷十四

詳校官庶吉士臣陳若霖

侍讀臣孫球覆勘

謄錄貢生臣章松雲

謄錄貢生臣郭壩

欽定四庫全書

稿文堂集卷十四

宋

慕容彥逢 撰

祭文

祭萬朝奉文

某罪逆不孝故春三月扶護東下秋七月與丈人相遇  
於維揚時丈人氣貌悅懌步趨輕捷瞻視有力飲啖倍  
常咸謂壽祉方未艾也拜別不半年凶問奄至嗚呼哀  
哉尚忍言之邪承靈柩至毘陵某泣血待盡不敢違几

筵前詣喪次謹遣弟某往致薄奠伏惟尊魂特垂鑒察  
祭壽光夫人文

某等罪逆不孝酷禍上延俾我慈親奄棄遐壽夏五月  
自京師扶侍神柩循汴東下達于淮泗又東濟于江秋  
七月至於宜興爰得吉卜以翼日甲申安厝於邑南篠  
嶺之原嗚呼痛哉自今以往一之日二之日永千萬年  
無復見我慈親號呼擗踊心肝摧裂罪逆深重蒼天蒼  
天尚饗

三省祭蔡顯謨母金郡君文

惟靈有婉其德有淑其儀閨閭之譽協於聲詩厥初告  
吉夢維熊羆是生賢子蔚為庭芝長從持橐仲飭朝綏  
清規雅望寵膺眷知方隆榮養溫清具宜奄其淪謝何  
痛如之奠有芳醴薦有明粢尚其未泯監此忱辭尚饗  
墓誌

宗室故騏驎使贈博州防禦使追封博平侯墓  
誌銘

惟博平侯叔樂字和甫昭化軍節度使觀察留後彭城  
郡公克孚之子深州團練使承訓之孫廣平郡王德隆  
之曾孫也母曰南康郡夫人石氏治平元年賜名授右  
內率府副率兩遷至右千牛衛將軍改莊宅副使五遷  
至右驂驩使勲上柱國爵天水郡開國侯食邑一千五  
百戶食實封一百戶歷陳州堰閘西京密務汾揚二州  
郡監濱州鈐轄崇寧元年十一月十九日終享年五十  
三贈博州防禦使追封博平侯以大觀元年某月某日



葬於汝州梁縣公恩性淳至好學自強居官恪勤所至  
有譽在濱時方歲飢饉公以招軍為請繼修城壁樓櫓  
俾食其力賴是全活者甚衆娶張氏封壽安縣君子四  
人輔之左班殿直翼之右班殿直直之得之皆三班奉  
職輔之直之早喪女四人長適左侍禁馮澄次適右班  
殿直王楫餘尚幼銘曰氣升清明魄降沉翳升與陽俱  
孰窺其際降宅在茲銘於新窀

宗室故贈武康軍節度使觀察留後封洋川郡

公墓誌銘

公諱叔澹字靖之保康軍節度使留後南康侯克凝之  
子虔州觀察使南康侯承睦之孫宣德軍節度使同中  
書門下平章事兼侍中廣陵郡王德雍之曾孫也母安平  
縣太君張氏慶曆八年賜名授右內率府副率累遷金  
吾衛大將軍秀州防禦使改宮苑使遷皇城使歷泰唐  
二州兵馬鈐轄崇寧二年三月十五日卒於唐州享年  
五十有三贈武康軍節度使觀察留後追封洋川郡公

以大觀元年某月某日葬汝州梁縣娶宋氏封長安縣  
君子八人千之右武衛大將軍簡之理之明之鯉之皆  
左侍禁昇之左班殿直賚之右班殿直瑛之三班奉職  
女九人長適三班奉職宋宜孫餘在室孫十一人翊三  
班借職竝竦餘未名孫女六人長適三班奉職潘唐餘  
尚幼公少嗜學問尤工為詩章事親盡孝居喪盡禮歲  
時薦享盡誠治家嚴肅居官廉謹以故姻族莫不賢之  
銘曰進德不怠以克有終嗟嗟愍冊洋川之公納銘幽

金史卷之八十四  
卷十四  
竊永詔無窮

宗室故左侍禁墓誌銘

宗室叔志字傳道廣陵郡王德雍之曾孫虔州觀察使  
南康侯承睦之孫保平軍節度使成國公克戒之子母  
曰同谷夫人李氏所生母王氏初授右班殿直累遷左  
侍禁歷監蔡州褒信酒務監在京倉耀州兵馬監押性  
剛正喜立事功居官為當路稱薦崇寧二年五月三日  
卒享年三十有六以大觀元年三月二十九日葬汝州

梁縣子三人誨之誼之諳之銘曰窵土為宮既寧既密  
刻石同藏始終尚吉

宗室故懷州防禦使河內侯墓誌銘

公諱徽之字天和武信軍節度使循國公承慶之曾孫開  
府儀同三司建國公克繼之孫開府儀同三司榮國公  
叔敖之子初授太子左清道率府副率累遷右監門衛  
大將軍崇寧二年舉進士女適姓某孫四人曾祖某祖  
某父某知微有賢行予女弟歸焉將葬請予為銘義不

可辭銘曰性淳謹言行慈良積善在躬宜吉祥受祉未  
豐今也亡天之報施官難量詵詵子孫來者長有如不  
信考銘章

宗室右金吾衛大將軍河州防禦使贈保慶軍  
節度觀察留後追封房陵郡公墓誌銘

公諱叔尊字應之鎮寧軍節度使濟國公克彰之子相  
州觀察使克桀之孫潁川郡王德彝之曾孫也母曰永  
嘉郡君楊氏嘉祐四年授太子右內率府副率累遷至

右金吾衛將軍河州防禦使崇寧二年二月十八日終  
享年四十有九贈保康軍節度使觀察留後追封房陵  
郡公大觀元年三月二十九日葬汝州梁縣娶潘氏封  
永康縣君先公卒子五人祚之故右侍禁襲之左班殿  
直襄之右班殿直一不及名卒女三人長適左班殿直  
徐肩餘卒孫五人公明公忠公哲二尚幼公仁厚端謹  
事親以孝聞善與人交久益親躋平居耽玩經籍口不  
掛臧否晚得釋氏書說之頗謂有得宗正狀公行實如

此銘曰稟質之粹蹈慈祥兮操行之潔好端莊兮學務該綜士自強兮晚誦內典悟津梁兮有賢如公令譽彰兮刻銘幽石永有光兮

宗室故西頭供奉官墓誌銘

宗室叔璫字君玉華州觀察使華陰侯克告之子鎮寧軍節度使同中書門下平章事陳國榮僖公承錫之孫潁川安簡王德彝之曾孫也母曰安定縣君杜氏六歲賜名授右班殿直累遷西頭供奉官歷監相州廣濟軍



庫權貨務最後監真定府市易務不赴崇寧二年十二月二十九日卒享年三十有四以大觀元年三月二十九日葬汝州梁縣妻張氏子五人相之樞之皆業進士某幼未及名卒女五人在室者三人餘早卒君事親以孝涖官以勤與人交以信壽雖不延位雖不顯其嚮善有足嘉者銘曰質幹之良尚多後祉壽弗克延命也天只

宗室故左班殿直石誌

左班殿直叔珪紹聖二年正月十九日生崇寧二年六月八日卒享年九歲大觀元年三月二十九日葬汝州梁縣曾祖德彝故潁川郡王祖承錫故鎮寧軍節度使同中書門下平章事陳國公父克家見任右千牛衛將軍謹誌

宗室故右武衛大將軍真州刺史開國公贈密州觀察使追封高密侯墓誌銘

公諱叔鄭字季武右領軍衛將軍克省之子武信軍節

度使觀察留後遂寧郡公承衍之孫潁川郡王德彝之  
曾孫也母曰長壽縣太君王氏治平二年賜名授右內  
率府副率累遷右武衛大將軍真州刺史勲上柱國爵  
開國公食邑一千六百戶實封五百戶崇寧三年三月  
十五日卒享年四十有一贈密州觀察使追封高密侯  
大觀元年三月二十九日葬汝州梁縣娶郭氏封永寧  
縣君公性孝友善與人交中外姻戚罔不歡睦國有大  
禮擇宗室執事公多與焉銘曰德之吉矣受祉維寧天

胡嗇之弗永齡刻此幽石揚芳馨

宗室故右金吾衛大將軍雄州防禦使贈安化  
軍節度觀察留後追封高密郡公墓誌銘

公諱叔納字才元曾祖德雍廣陵郡康簡王祖承睦虔  
州管内觀察使南康侯父克彙安化軍節度使昌國公  
皇祐六年賜名授右內率府副率累遷右武衛大將軍  
階州刺史改康州團練使進右金吾衛大將軍雄州防禦  
使公莊重沉默無聲色嗜好獨喜誦書尤有得於老莊

之言居昌國公喪哀毀盡禮嗣濮王宗晟往弔之曰若  
公家父子孝義復何用宗官乎奉朝請三十年未嘗有  
過宗寧三年八月三日卒享年五十有二贈安化節度  
使觀察留後追封高密郡公以大觀元年三月二十九  
日葬汝州梁縣娶彭氏封宣城縣君子二人堅之左侍  
禁早卒瑛之三班奉職女二人長適右侍禁梁姓次適  
右侍禁馬慶嗣女一人尚幼銘曰儀儀高密慎終如初  
聲色在前委而勿趨開卷有得資以自娛吁其賢矣視

此銘書

宗室故金吾衛大將軍淄州防禦使贈安化軍  
節度觀察留後追封高密郡公墓誌銘

公諱叔峙字德瞻鎮寧軍節度使濟國公克彰之子相  
州觀察使承架之孫潁川郡王德彝之曾孫也母曰永  
嘉郡君楊氏公幼莊重七歲誦書日至數百言長益邃  
於學事親孝永嘉夫人有疾公刲股進之遂愈居喪水  
不入口者三日終制疏素性多巧思自奕射聲律咸精

其能累官至右金吾衛大將軍淄川防禦使勲上柱國  
爵開國公食邑三千七百戶食實封七百戶崇寧三年  
六月十日卒享年四十有七以大觀元年三月二十九  
日葬汝州梁縣子九人延之左班殿直進之右侍禁縱  
之承議郎在之三班奉職緝之靖之竦之竑之翊之皆  
未仕而縱之中進士第進之在之緝之皆薦於有司女  
四人長適內殿承制閤門祇候張益次適故右班殿直  
閤門祇候兼尚書局奉御鄭純次在室次早卒孫十有

一人公恂公望公佐公似公仁公倚公才餘早卒孫女  
四人銘曰宜泰而莊宜佚而勵操行之淳學問之邃以  
振厥聲以綏厥位刻詩方砥以質幽寔

宗室涇州觀察使第十七子石誌

鄴之元祐七年正月五日生崇寧四年四月二十五日  
卒享年十四以大觀元年三月二十九日葬汝州梁縣  
曾祖承亮故樂平郡王祖克冲故右驍衛大將軍父叔  
皮見任涇州觀察使謹誌



宗室故西頭供奉官墓誌銘

宗室昇之字君儀涇州觀察使叔皮之子右驍衛大將軍克冲之孫感德軍節度使同中書門下平章事追封樂平郡王承亮之曾孫也初授三班奉職累遷西頭供奉官歷潁昌府商稅務在京麥界牧養馬監後調潁州界溝鎮不赴君七歲能誦書見謂敏悟既長益嗜學問所著歌詩雜文甚多居官勤恪數為當路稱薦又以勞列被賞崇寧四年九月二十四日卒享年三十有四以大

觀元年三月二十九日葬汝州梁縣娶張氏子二人公輔嘗薦於有司公輅尚幼女六人長適張天祐餘在室銘曰諏日既吉卜宅既寧發揮行實尚監茲銘

宗室故三班殿直石誌

右班殿直叔官元祐元年四月二十六日生崇寧四年閏二月二十八日卒享年二十大觀元年三月二十九日葬汝州梁縣曾祖德彝故潁川郡王祖承襲故鎮寧軍節度使同中書門下平章事陳國公父克家見任右

千牛衛將軍謹誌

宗室故右武衛大將軍文州刺史贈同州觀察  
使追封馮翊侯墓誌銘

馮翊侯爵之字子厚保康軍節度使房國公叔武之子  
光州團練使克虔之孫青州觀察使樂安侯之曾孫也  
母曰長安郡君劉氏初授率府副率累遷右武衛大將  
軍文州刺史崇寧四年五月八日卒享年四十有五贈  
同州觀察使追封馮翊侯娶范氏封永安縣君先公卒

子四人公謹三班奉職早卒公倬公俅皆右班殿直公佑三班奉職女三人一卒餘尚幼公事親盡孝待人盡禮而奉已甚約獨喜誦五經諸子之言以大觀元年三月二十九日薨汝州梁縣銘曰祿位之寵有暉有華德雖稱之壽弗遐安此吉宅宜其家

宗室故右金吾衛大將軍鳳州防禦使贈安化軍節度觀察留後追封高密郡公墓誌銘

公諱叔耘字勤之宣德軍節度使兼中書令廣陵康簡王

德雍之曾孫太尉樂平恭靜王承亮之孫定州觀察使  
博陵侯克暨之子也母曰壽安縣君王氏所生母曰永  
福縣太君宋氏嘉祐三年賜名授太子右內率府副率  
累遷右金吾衛大將軍鳳州防禦使勲上柱國爵天水  
郡開國公食邑四千五百戶食實封一千戶崇寧五年  
九月五日終享年四十有九贈安化軍節度觀察留後  
追封高密郡公娶李氏封永康縣君子節之左侍禁理  
之左班殿直資之右班殿直握之三班奉職恭之翼之

和之立之孫公巽公懋公事親孝祖母篤疾齋戒燃肌  
以禱於神幼失所生母歲時愴感揮涕終日天資淳厚  
言不及臧否喜誦道書晨昏不懈大觀元年三月二十  
九日葬汝州梁縣銘曰事親惟孝守身惟誠本既立矣  
如木之榮歿而不可尚監茲銘

宗室故濮州團練使贈潤州觀察使追封丹陽  
侯墓誌銘

丹陽侯叔前字伯先中正軍節度使同中書門下平章

事江國公之曾孫青州觀察使樂安侯承遵之孫蔡州  
觀察使汝南侯克觀之子母曰廣平縣君宋氏公幼喜  
誦書長益敏於學文詞筆札衆所歎譽事父母孝汝南  
侯有疾公割股進之遂愈人以為誠孝所感崇寧四年  
三月二十四日卒享年五十有二公初授太子右內率  
府副率累官至濮州團練使贈潤州觀察使追封丹陽  
侯以大觀元年三月二十九日葬汝州梁縣娶張氏封  
和順縣君先公卒子八人孝之左侍禁成之右侍禁禮

之匱之皆左班殿直祐之三班奉職尚之漢之餘未名  
女二十有二人左侍禁曹綬右班殿直黃琬三班借職  
徐演三班奉職曹濬左班殿直夏儒其壻也一適三班  
奉職郭才卿先卒餘在室孫公俞公愈公恕公志餘未  
名孫女九人銘曰敏學問善文辭事親誠孝身可剗祿  
豐位顯惟其宜享年勿遐人所悲耀茲潛德有銘詩

宗室故右班殿直墓誌銘

宗室翊之字望敬曾祖承亮感德軍節度使同中書門



下平章事樂平郡王祖克冲左驍衛大將軍父叔義右  
武衛大將軍濱州團練使元祐二年補三班奉職改右  
班殿直崇寧四年十一月二十五日卒享年二十有八  
以大觀元年三月二十九日葬汝州梁縣君幼不喜弄  
長益孝謹好學問屢試於有司兩娶皆石氏子一人公  
侃銘曰遵彼汝墳卜窆云吉世次行能考茲芳石

宗室故贈密州觀察使追封高密侯墓誌銘

公諱矢之字伯直右金吾衛大將軍汝州防禦使叔縱

之子左驍衛大將軍克冲之孫感德軍節度使同中書  
門下平章事樂平郡王承亮之曾孫也初賜名授右內  
率府副率累遷右武衛大將軍渝州刺史崇寧四年正  
月十九日卒享年四十有三贈密州觀察使追封高密  
侯娶陳氏封永寧縣君先卒子八人公澤左班殿直公  
濟右班殿直公潤公漑公泳公淨公湜女二人長適右  
侍禁楊京次在室孫四人公莊重寡言喜誦書能為文  
辭其事親以孝大觀元年三月二十九日葬汝州梁縣

銘曰爵祿之盛既克保之贈襚之優亦克稱之行實可  
考銘以昭之

宗室故左班殿直墓誌銘

宗室叔瀧字德源莫州防禦使克施之子河東郡王承  
衍之孫武昌節度使同中書門下平章事德存之曾孫  
也母曰壽昌縣君王氏元祐元年賜名補右班殿直改  
左班殿直崇寧四年授滑州倉草場未赴五年二月二  
十一日卒享年二十有五娶夏氏繼室郭氏君性敏悟

八歲能誦書得升中學長益親翰墨嘗獻崇寧聖德頌  
其趨尚為士大夫所稱處家孝友不喜聲色以大觀元年  
三月二十九日葬汝州梁縣銘曰如蘭之馨方茁其芽  
忽云悴矣姻族之嗟

宗室故左班殿直石誌

宗室田之字耕道深州團練使承訓之曾孫昭化軍節  
度使觀察留後高密郡公叔建之第四子也母曰永安  
縣君晁氏熙寧二年賜名授右內率府副率累官至右

千牛衛將軍勲上護軍爵開國公崇寧三年坐法廢五年四月十六日卒享年四十有二以大觀元年三月二十九日葬汝州梁縣娶鄭氏封仙源縣君先君一年卒子公式三班奉職三女在室銘曰名秩之寵自其幼時終以無祿嗚呼可悲

宗室丹州防禦使第五子石誌

殤子安之元符元年八月二十四日生崇寧五年六月十四日卒年九歲大觀元年三月二十九日葬汝州梁

縣曾祖承操故涇州觀察使安定侯祖克助成德軍節度觀察留後常山郡公父叔履見任右金吾衛大將軍丹州防禦使謹誌

宗室故右監門衛大將軍贈懷州防禦使追封河內侯墓誌銘

河內侯諱叔侑字子儀同州觀察使馮翊侯克貺之子寧國軍節度使原國公承炳之孫宣德軍節度使同中書門下平章事兼侍中樂平郡王德雍之曾孫也母曰

北海縣君王氏熙寧元年賜名授太子右內率府副率  
累遷左監門衛大將軍勲上柱國爵開國公崇寧五年  
六月一日卒子五人裕之祿之皆三班奉職祚之早卒  
餘未名女六人適右班殿直杜彥侯進士郭球曾允誠  
一在室餘早卒公性純孝母疾革刺肌血以禱於神未  
幾康復幼喪其母言及必涕泗交下姻族稱之大觀元  
年三月二十九日葬汝州梁縣銘曰至矣孝德一言而  
該公之事親終身之哀刻茲方石以播清埃

宗室故左班殿直墓誌銘

宗室叔惠字彥直五歲賜名授左班殿直崇寧五年三月二十  
月二十四日卒享年二十有二以大觀元年三月二十  
九日葬汝州梁縣曾祖德彝潁川郡王祖承錫鎮寧軍  
節度使同中書門下平章事陳國公父克蹈右千牛衛  
將軍母曰永春縣君夏氏總角讀書日至數百言稍長  
益勤講習上初建宗子學考選之法悉視成均君為多  
訓齋諭以稱職被恩云娶曹氏銘曰質淑賦之壽孰嗇



之終以無子吁其可悲

宗室故贈泉州觀察使追封清源侯墓誌銘

公諱叔紺字子春忠正軍節度使開府儀同三司秦國公克愉之子樂平郡王承亮之孫廣陵郡王德雍之曾孫也母曰平陽郡太夫人于氏所生母曰大寧郡太君郭氏五歲賜名授太子右內率府副率累遷右武衛大將軍興州團練使勲上柱國爵開國公實封八百戶崇寧五年正月二十七日卒享年五十有四贈泉州觀察使追

封清源侯娶白氏封壽光縣君先公二十年卒子十一人益之西頭供奉官和之右侍禁進之左班殿直信之三班奉職德之舉進士岳之教之勝之高之感之未名女六人長適三班奉職郭滌次適曹激二在室早卒公事親孝居喪以毀聞天資剛正守禮不越治家訓子肅如也以大觀元年三月二十九日葬汝州梁縣銘曰孝以事其親禮以裨其身守貴若茲亶惟善人哀榮終始勒於幽珉

宗室東頭供奉官夫人王氏墓誌銘

宗室東頭供奉官叔璵之夫人王氏曾祖潛定武軍節  
度觀察留後祖中庸左衛上將軍父承昭皇城副使母  
曰長安縣君李氏夫人性柔慧事父母孝既嫁上承下  
撫無不得其歡心崇寧三年九月五日卒享年三十有  
一大觀元年三月二十九日葬汝州梁縣子七人元之  
遠之未仕逵之遷之迪之述之通之皆卒女七人適進  
士胡琳三班奉職李伯總餘尚幼銘曰慈祥柔順婦德

維嘉宜壽而天命邪非邪

故仁和縣君王氏墓誌銘

宗室右金吾衛大將軍秀州防禦使惠之夫人王氏世  
開封人曾祖審琦贈中書令追封秦王祖承佑贈左武  
衛大將軍父世彥朝散郎夫人在家以孝聞既嫁事姑  
如事其親防禦君少有譽於官邸夫人能相以恭順撫  
諸子均一人不知嫡庶之異崇寧四年四月二十一日  
卒享年五十有九子十人詠之右內率府副率進之益

之皆左侍監說之餘未及仕者六人皆早卒女九人左班殿直武立西頭供奉官王琪左班殿直衛元之三班奉職李崇左侍禁羅遠右殿直白粹中右班殿直王公倬其壻也餘早卒孫男九人公泰三班借職餘未仕孫女三人夫人之歿術者以陰陽拘忌為言再浹日乃殮方暑肌色如生人以為積善之報云大觀元年三月二十九日葬汝州梁縣銘曰善必有報天理之常乃如夫人終以吉祥云誰不信監此銘章

宗室左侍禁夫人龔氏墓銘

左侍監訢之夫人龔氏幼聰慧既嫁能相其夫以義疾雖革亦以忠孝為言崇寧元年正月一日卒於處州之官舍享年二十有七以大觀元年三月二十九日葬汝州梁縣女二人尚幼夫人蓋金紫光祿大夫世昌之曾孫左藏庫副使意之孫西頭供奉官咸之子也銘曰歲時協吉宅兆允臧吁其葬矣刻誌同藏

故德安縣君彭氏墓誌銘

宗室濮州防禦使叔干之夫人彭氏左藏庫使崇正之女左千牛衛將軍再問之孫武昌軍節度使贈中書令睿之曾孫年二十一歸於防禦封德安縣君夫人治家訓子有法奉已雖約至賙人之急弗吝焉歲時薦享如見所祭喜誦釋氏書朝夕靡懈崇寧二年二月二十日終享年五十有八以大觀元年三月二十九日葬汝州梁縣子十人勳之右武衛大將軍達州刺史贈滄州觀察使景城侯劼之前右侍禁助之左班殿直勗之勣之

皆左班殿直餘早卒女已嫁者二人壻內殿崇班許彭年  
右班殿直任仲述三人尚幼八人早卒孫十有一人公  
侃右班殿直公偉公佐公僅公義公順一未名餘早卒  
孫女十人曾孫二人銘曰生宜厥家歿安此室刻誌同  
藏惟德之述

華陰侯妻杜氏墓誌銘

宗室故贈華州觀察使追封華陰侯克告之夫人杜氏世  
家鎮陽自昭憲皇后貴始為開封人曾祖審進靜江軍



節度使贈太師中書令兼尚書令追封京兆郡王祖彥  
彬禮賓副使父贊仁閤門通事舍人贈左屯衛大將軍  
夫人幼端莊不喜嬉戲年十七歸華陰侯事舅姑以孝  
率媵妾以正訓子孫以義自奉清約頗通內典持五戒  
行終身不廢崇寧元年十月二十三日卒享年六十有  
六封安定縣君子十有一人叔陶贈建州觀察使追封  
建安侯叔瑚故率府率叔莆內殿崇班叔擊故左侍禁  
叔璫故西頭供奉官叔靄叔鍵皆西頭供奉官叔躬左

侍禁叔庶左班殿直餘不及名卒女十有二人長七人  
早卒次故金華縣君適右侍禁呂哲次長壽縣君適左  
侍禁李倫次永壽縣君適前右班殿直馬宇次適左班  
殿直杜琬次適右班殿直王宗文孫三十有四人保之  
伋之皆左侍禁傳之故三班奉職修之靖之相之端之  
誼之訓之傑之价之樞之禮之說之澤之潤之俊之皆  
習進士而靖之相之端之隸業宮學以行誼稱愈之翊  
之說之靖之早卒餘不及名孫女二十有六人長適故

右侍禁段希顏次適右侍禁華鎮次適通仕郎周士堯  
次適將仕郎宋亶次適三班借職郭授次適進士劉公  
輔次適三班借職鄭公案次適三班奉職高公柔次適  
三班借職王公總在室者十有二人餘早卒以大觀元  
年三月二十九日葬夫人於汝州梁縣銘曰宜佚宜豐  
不怠不侈宗婦若茲允也賢只詵詵子孫報施在此

故和義郡君胡氏墓誌銘

夫人姓胡氏開封人衛尉少卿令儀之曾孫耀州三原

縣主簿規之孫渭州軍事判官潛之女也治平元年歸於宗室成州防禦使叔彖初封金華縣君進和義郡君崇寧二年四月三日卒享年五十有五子三人但之右侍禁次昇之景之女適左班殿直王仲瑞其二早卒夫人事舅姑以孝相夫以義訓子以學撫媵妾以慈晚喜釋氏持誦不懈以大觀元年某月某日葬汝州梁縣銘曰維歲丁亥日吉辰良卜茲新窆萬歲之藏

故仙源縣君鄭氏墓誌銘

宗室前千牛衛將軍田之夫人鄭氏贈太師開府儀同  
三司兼尚書令守忠之曾孫左驍衛上將軍惟懿之孫  
左藏庫使价之女也母曰華源郡君趙氏夫人幼聰慧  
事父母盡孝既嫁事舅姑盡禮喜誦書能為詩章崇寧  
三年九月一日卒享年三十有五以大觀元年三月二  
十九日葬汝州梁縣子公式三班奉職女在室銘曰歲  
月惟吉宅兆惟寧歸從其夫考德有銘

宗室右侍禁夫人李氏墓誌銘

宗室侍禁叔旄之夫人姓李氏世開封人曾祖德昭昭  
化軍節度使贈太師尚書令兼中書令追封崇國公祖  
惟賢榮州團練使贈右金吾衛上將軍父宗述供備庫  
副使夫人幼敏慧年二十歸於叔旄性謹約不喜華侈  
崇寧三年七月十四日卒享年二十有八以大觀元年  
三月二十九日葬汝州梁縣子一人未名卒女二人尚  
幼銘曰有粹其實有淑其聲考茲幽石歿有餘榮

趙叔慈妻賈氏墓誌銘

縣君宗室故懷州防禦使河內侯叔慈之夫人賈氏世  
開封人曾祖常左羽林衛將軍祖德滋右金吾衛將軍  
父世奕右屯衛大將軍夫人性端靖平居寡言笑治家  
有法宗姻稱之封永壽縣君崇寧四年十二月二十四  
日卒享年五十大觀元年三月二十九日葬汝州梁縣  
予二人得之待之皆左班殿直早卒女二人長適進士  
郭俅次在室銘曰猗嗟夫人柔德靜專宜壽宜貴誰其  
嗇焉視銘考德宗婦之賢

宗室東頭供奉官夫人方氏墓誌銘

宗室東頭供奉官叔驍之配方氏世開封人曾祖景贈  
左金吾衛將軍祖琬右班殿直父倜夫人性柔淑在家  
勤女工既嫁事舅姑盡禮順承其夫睦若賓友喜誦佛  
經能行其所戒崇寧二年十一月三日卒享年三十有  
五以大觀元年三月二十九日葬汝州梁縣子四人貫  
之翼之拱之充之女五人銘曰歸儷其淑既相諧熙曷  
不偕老吁其可悲



宗室東頭供奉官夫人張氏墓誌銘

夫人張氏蓋文定公齊賢之後曾祖宗禮工部尚書祖  
子奕中散大夫父仲昌內殿承制年十九歸於宗室東  
頭供奉官叔寄上承下撫無不得宜疾革謂其夫曰無  
以情傷理其送終從儉嗚呼可哀也已崇寧二年八月  
二日卒享年二十有八以大觀元年三月二十九日葬  
汝州梁縣子三人女二人皆幼銘曰泠泠緒言不愆於  
理刻諸幽珉襲芬圖史

宗室內殿崇班第三女石誌

殤女元符元年十月十九日生崇寧三年九月十二日  
卒年七歲大觀元年三月十九日葬汝州梁縣曾祖承  
操故涇州觀察使崇安侯祖克勅故建寧軍節度使開  
府儀同三司建國公父叔蓬見任內殿崇班謹誌

宗室舒州防禦使第四女石誌

殤女崇寧三年九月十日生明年四月二十八日卒大  
觀元年三月二十九日葬汝州梁縣曾祖承睦故虔州

觀察使南康侯祖克戒故保平軍節度使成國公父叔  
涉見任舒州防禦使謹誌

宗室西頭供奉官第四女石誌

殤女崇寧元年三月二十七日生三年正月二十三日  
卒大觀元年三月二十九日葬汝州梁縣曾祖承操故  
涇州觀察使安定侯祖克勅故建寧軍節度使開府儀  
同三司建國公父叔蹊見任西頭供奉官謹誌



欽定四庫全書

摘文堂集卷十五

宋 慕容彥逢 撰

墓誌

朝奉大夫致仕驍騎尉賜緋魚袋石公墓誌銘  
越之新昌石氏考諸譜錄蓋萬石君之後也石氏初徙  
新昌煢然一身而子孫蕃延自成平以來繼以文辭行  
誼起家於今官學愈盛歲時歸謁章綬相耀宗屬數十  
百人絃誦洋洋貢於鄉選於學射策於廷曾靡虛籍以

故為東南望族公諱景衡字叔平新昌人也曾祖渥隱  
居不仕祖待舉祕書丞累贈朝散大夫父行之大理寺  
丞累贈中大夫公幼有俊譽長益邃於學儀狀端穆進  
趨翼如也神宗皇帝初以經術造士公試太學數中優  
等嘗詣丞相王文公特見器重謂中大夫曰石氏名家  
信不乏人中熙寧六年進士第調台州天台尉海濱多  
剽攘民以為病公設方略逆制之亡敢竊發方歲大饑  
流寓屬於境賴公賑卹以全者不可勝計移和州烏江

令公材力精健奮厲自彊察蠹弊根穴必去之吏雖猾  
亡以為也士族有倚勢凌民既奪之產反以搆訟有司  
觀望不決使者諉公公不為勢撓歸產於民兩造成服  
時詔諸路議免役法公於淮西多所裁定入見改宣德  
郎知福州長溪縣長溪廣袤千里民事劇甚令率以罪  
去公至若無足治者部使者以積欠繩下輸限峻迫追  
究煩擾公詣郡白狀請俟中覆迺行使者聞之怒將中  
公以法會察訪使至以閤欠不當治他縣悉被劾使者

始媿謝境有彊寇公親捕獲之賞中優格公曰為民除害令職也殺人以幸遷予誠何心哉卒平反之寇以減死論公之所存蓋如此居官五年民繪像以祠之當路交章以治最聞衆冀拔擢公曰吾母老矣豈貪仕進時必求所以便親養者遂監楚州糧料院公雖處閒局而郡有疑難事輒藉公參決他郡守下吏獄久不具本路以詔旨選公覆按公原情定罪得輕重之中被訊者自以不冤也秩滿丁外艱服除通判秀州未幾轉運司表



充管勾文字此官久廢文牘猥積公為條目區別之一  
路財賦出納迺至牒訴纖悉如視諸掌使者不勞以治  
就遷通判常州丁內艱不赴服除通判歙州下車奠謁  
廟學顧牆宇庳陋慨然以身董役闢而新之識者謂公  
為政知所先矣嘗攝郡事獄有淹繫百餘遇暑多斃公  
既閱實歎曰論罪皆當笞耳何至是耶立辨出之頃之  
以疾得謝杜門里居一室蕭然宴坐終日見者咸悚伏  
焉公晚聞內典益進此道視窮達死生不以置欣戚畏

慕於心故於進也恬於退也勇縣歷三紀位不過佐郡  
而年未六十遽乞身以歸自屬疾却醫不問預治斂具  
為書戒諸子一夕命盥沐既畢而逝實崇寧三年九月  
九日享年五十有八以四年九月庚申葬於新昌蘭峴  
山之原公官至朝奉大夫勲至驍騎尉以元符元年郊  
恩賜五品服娶虞氏故集賢校理諸王府侍講太熙之  
女封永安縣君子二人公弼以蔭補太廟齋郎公望舉  
進士女二人長適承務郎簽書池州判官韋壽卿次適

進士張垂有文十卷詩二十卷曰南明集公葬之明年  
予初免喪未親筆硯而公弼來速銘予弟叔畸公之從  
女夫也數夢公具衣冠請銘於予語極諄切予聞愴然  
為序而銘之嗚呼公雖亡有不亡者存若公孝於親友  
於兄弟施于有政蓋古所謂躬行君子者公弼公望爽  
邁不羣人知公之有後以為積善之報云銘曰顯矣石  
氏初自衛卿衛卿維碁國之純臣駘仲繼出時亦衛族  
得嗣以龜喪不珮玉族遠而徙散處四方奢奮苞鑒聲

烈相望新昌之別實維近世譜錄綿延萬石之裔儀儀  
大夫色莊以溫孝悌忠信有學有文施於為政恭寬敏  
惠談笑指麾民嬉吏畏飛不盡翰孰使之然秩祿豈多  
謝不待年曰維小臣匪私於佚負薪之憂義辭以疾疾  
不訊醫亡不怛化迺如之人奚往不暇維慶之詒既克  
有子天之報施故將在此

朝奉郎致仕武騎尉賜緋魚袋葛公墓誌銘

崇寧三年十有一月己亥朝奉郎致仕賜緋魚袋葛公

終於京師諸孤護喪歸常之江陰將以五年十月某甲  
子葬於青陽鄉郭里之原卜既吉迺敘公世次行治泣  
來請銘某公之子婿也知公本末該盡宜無愧於辭謹  
拜手泣為之序曰葛之先嬴姓夏后分封以國為氏唐  
天祐中公之六世祖濤自廣陵南徙初有籍於江陰濤  
再世生詳詳生惟甫累贈吏部尚書尚書生密中慶歷  
進士第有高行卒官承議郎累贈朝請大夫為公之皇  
考大夫娶胡氏贈建德縣太君繼室陳氏懷仁縣太君

公胡出也諱書思字進叔學識恩性在孺有聞既長博考羣經旁搜百家之說世父兵部尚書宮語大夫曰是子名第不足言後將以文義顯嘉祐中試開封府王文公為考官得公事道論稱之再試為陳公襄所知擢第三一時羣進士歆慕誦公之文自以得所矜式諸公要人交口贊譽聲聞藉藉傳四方中熙寧六年進士調睦州建德縣主簿時大夫既得謝里居公不忍違去投劾侍養十餘年晨暮在側意有所鄉輒逆得之夜暴雷雨

亟起問安退不敢寐凡食飲藥劑迺至服用纖悉必躬  
省之大臣有嘉公志節者表學官弗就居久之大夫勉  
公仕且樂從之行始以吉州司戶參軍監湖州新市務  
公喜祿釜逮親顏色自得不知關市之界期年大夫卒  
孺慕以泣哀動行路尋得臂疾或告有疾食肉五十不  
致毀禮也宜稍進肴味弗聽終制如始喪者服闋累年  
迺調開封府封邱縣主簿移和州防禦推官知楚州連  
山縣丞公悃悃無華事必遠慮不以便文自幸歷佐兩

邑令荷以治歲蓄按田蠲貸以實無所顧望數令他邑  
及決旁郡滯訟皆以能稱淮南議穿支家渠沮和相半  
計司諉公公條上便宜與所當經畫者渠成人以公為  
有賜也入見改宣德郎故事當任親民公委資考求閒  
局里中遂監常州酒遷奉議郎上即位遷承議郎加武  
騎尉賜五品服差知婺州永康縣不赴改監秀州鹽稅  
務課羨中賞格匿不自列會序遷朝奉郎歎曰吾任事  
之日淺褒贈及親賞延於子君恩厚矣尚何求遂致仕



公宇量奧廣恥自表暴仕不遇合回旋筦庫晏如也所  
至以安遇名軒自號虛遊子居官無秋毫墨染其所用  
舉者常沛然溢格性謙畏惟恐忤物至持法守正雖大  
吏欲干以私辭氣不奪馭下寡譴罰冀以至誠格物然  
人自不能欺也公田歲入輒推予民在家無聲色玩好  
齋莊慎獨不愧屋漏遇人無疏戚惟謹尺牘必楷片言  
必信卹孤賑乏怒如己私大夫沒後追慕白首不替常  
以所告戒者自警語及之必嗚咽流涕新未薦不敢嘗

歲時怵惕如見所祭昆弟若從子孫內外干指公處尊卑間友愛惇篤無不順適諸妹擇命士之賢者歸之問撫饋餉戀戀靡懈善教子言論而身率之以故諸子秀拔有立俱為清議所重而次仲勝仲遂為同年進士鄉閤歸美焉自居大夫喪日課內典默契於心晚益喜持誦既屬疾神檢不亂時勝仲以太學官迎養能致國醫公不聽顧告以死生常理遺書戒毋侈葬疾七日而逝享年七十三娶侍其氏右正議大夫泳之女克有閨範

是儼是相先公十四年卒贈北海縣君子次仲通仕郎  
吉州州學教授儀仲早卒和仲將仕郎勝仲試太學正  
女長適某次適侍其齔次適張滢孫男九人立隆立方  
立悌立中立大立師立器立象立受孫女五人有文十  
卷號安遇集覽者以是服公之所養也銘曰葆醇履坦  
晬然慈良有如葛公南方之強公初筮仕舒華煒煌友  
生愕眊疇敢比望事違願始以退為常玉韞亦潤蘭幽  
自芳循陔之感白首不忘奉盈之戒燕居益莊維此卓

行千古有先行成名立位界奚傷晚通朝著寵有身章  
引年歸老既壽而康儀儀子性命服在傍天之報施於  
焉孔彰謂公云歿不朽者良納銘幽窆萬世之藏

孫氏墓誌銘

奉議郎知貴州軍州事贈朝請郎邵公潛之夫人孫氏  
父曰秉陽蓋常州宜興人夫人恩性淳至幼讀書至父  
母之年以喜以懼輒俛首揮涕或問之對曰言中吾心  
是以感而泣也親有疾夙夜侍左右寢食俱廢居喪水

不濡唇者累日歲時致享泣薦所嗜既歸邵氏舅姑猶  
在長幼千指夫人上承下拊罔不歎踴臨財辭豐取薄  
不為苟得姻戚有患難衆所畏忌弗顧夫人必往調急  
賑賈若已有之善教子幼課以讀書長誨以行己自熙  
寧以經術造士夫人之四子相繼擢進士第長曰材薦  
開封第一為元豐御史歷銓部學省出長大邦入位少  
列崇寧四年上追懷之贈典優異次曰棣試有司亦中  
選首曰挺曰搏皆有聲於太學而搏廷試高等鄉閭言

教子者以邵氏為能夫人自中年不事脂澤與朝請公  
同受籙於龍虎山道服誦經事觀音像甚勤嘗苦臂疾  
夢白衣女人按穴刺之出白氣丈餘翌日乃瘳將終神  
鑒不亂召諸孫至前遺以奩中物從容飲歎而逝時居  
襄之官舍實崇寧五年十月二十五日享年七十有六  
以大觀二年十二月二十有七日附於邑西太蘆山朝  
請公之墓夫人初封仁壽縣君改封壽昌又改仁壽縣  
太君材官至朝奉大夫贈右諫議大夫林承議郎魏王

宮大小學教授挺瀛州防禦推官知河南府潁陽縣事  
搏從事郎襄州錄事參軍一女適登仕郎桂州荔浦縣  
令曾繹材棟挺及女皆先夫人卒孫十有四人曰勲曰  
然曰熊曰熹曰薦曰譙曰黠曰熹曰緯曰緝曰紳曰絳  
曰絳曰繹勲熊皆將仕郎餘未仕孫女七人曾孫六人  
曾孫女四人銘曰君山之下兮荆溪之濱山秀溪深兮  
卜祔惟寧體魄雖瘞兮魂氣則升降祉於家兮蘭玉在  
庭疏封未艾兮沒有餘榮謂予不信兮來監茲銘

陳君墓誌銘

君諱思齊字景賢饒之鄱陽人曾祖某祖某皆不仕父某三班奉職君幼聰警誦書一再過不忘三班君異之既長以家難廢學慨然投筆歎曰藝文致身夫豈不願晦迹方劑亦仁術也乃以醫技翱翔江湖間悅常之宜興山水清麗遂家焉君診治按古雖疾沈痼他醫未能治至君指日決愈遇求療者心惴惴焉如己苦之有貧不自給復賑以新菽賴是全活者甚衆宜興士族盛君



從薦紳遊罔不歎韙性喜酒選勝引滿笑談自得見者  
欲傾家釀也自以學不遂力教諸子夜坐燭下身率之  
不三鼓不寢聞四方賢君子俾從之學故阜成少有士  
譽未壯中第邑人善教子者以君為能元祐八年八月  
辛酉終享年六十有二以紹聖元年十有二月某日葬  
於邑西某鄉之原娶高氏生四子曰存曰阜成授廬州舒  
城縣尉曰敏成曰彥成皆應進士舉一女適唐原本孫  
男三人季長季升季友孫女四人阜成子友也泣以銘

請義不可辭銘曰善必有慶孰云嗇之命邪非邪我儀  
圖之弗羸於躬必昌厥嗣丹桂一枝本根有自惟影惟  
響報施如之誰疑弗信監此銘詩

單君墓誌銘

君諱照字擇之婺州金華縣人喜誦習衆謂明晤凡陰  
陽卜筮方術之學無所不曉事寡嫂如事母至老不懈  
家貧無兼日之儲有子皆使就學紹聖初知微貢於鄉  
為第一中進士科崇寧三年擢温州州學教授鄉里善

教子者以君為能四年某月某日以疾終於溫之官舍  
享年五十有九以大觀元年十月某日葬於邑東某原  
娶某氏子四人知微通仕郎知彰知柔知剛皆舉進士  
女適姓某孫四人曾祖某祖某父某知微有賢行子女  
弟歸焉將葬請予為銘義不可辭銘曰性淳謹行淳良  
善積在躬宜吉祥受祉未豐今也亡天之報施實難量  
誥誥子孫來者長有如不信考銘章

單季隱墓誌銘

君諱鏐字季隱其先金陵人曾祖誼初有籍於常之宜興祖熙考應俱以德善稱其交游多名卿賢士君少有志操從胡翼之先生肄業頗見推重長益邃於學著詩易春秋義解博考諸家之說斷以胸臆他經及子史皆手自抄纂篇帙盈度筆札細楷幾若摹印其為文務辭達事舉不喜浮靡論議衮衮可聽尤能言吳中水利以為荆溪當宣歙廣德下流東注震澤而震澤自吳江入於海今江隄連亘水勢壅閼古人濬治遺跡堙塞殆盡

誠能通海浦溝港以道吳江增江隄橋梁以決震澤又  
復故百瀆以疏荆溪則積水皆下譬如人身去鯁於咽  
口腹通矣有獻其說於朝者事下部使者使者諉君按  
行君察其屬忌之弗往也性樂易遇人傾蓋如故聽言  
置虛實一切傾信久知其玩謔弗愠也客至無踈戚留  
飲醉輒假寐頃刻即醒未嘗為酒困間有所感賦詩見  
意可傳錄者積數百篇年既高氣體益健請謝不避寒  
暑他人當疲劇而君處之自若宗寧中予憂居里閭君

過予日三數雖大雨雪聞外有履聲曰此必季隱也既而果然時君年七十有餘矣相見慰勉已必自敘所得經傳新意大編長卷常以自隨據案諷誦援筆改竄其心思目力非少年可及大觀四年正月十有三日壬子以疾終於家享年八十娶同郡余氏先君十有二日卒享年八十有四子三人曰源先卒曰子發曰端子發子友也有文行兩薦於有司又預崇寧貢籍鄉人舉遺佚又舉八行嘗為宗子學長女四人進士余安節蘇掖劉

迪周邁其壻也孫三人曰世南曰世英曰澤孫女二人  
冬十月二十有七日壬戌其孤遵治命以季隱及余夫  
人之喪葬於邑南羅漢峰之原予幼聞縣鄉尊長言君  
之考好賑施平日徜徉閭巷遇貧民不能自給密置鋸  
於門凡賓旅乞丐親舊急難隨多寡各厭其意資以全  
濟者甚衆咸謂單氏家資雖匱慶在厥後而君之兄錫  
中進士第儒術吏方有過人者乃卒於州縣君與弟鎮  
又皆老於場屋論者疑之然予觀自昔陰德之報遲速

雖不同而未嘗不效觀子發士望及諸孫秀拔異日必有華顯者銘曰嗟嗟李隱初激昂事與願違心永傷如彼榱桷材之良宜備雕刻塗青黃匠石弗顧委道傍百年孤幹摧風霜物有合舍維其常命邪非邪實難量優游里閭壽且康以彼易此奚否臧維天報施久乃彰有子有孫來者長

單氏夫人墓誌銘

深州文學余克甫之室曰單氏常州宜興儒家女也充



甫學行夙成甫弱冠以經術傳授迨今逾五十年門弟子發策決科踵登華顯而充甫蹭蹬以老其安於義命不以得失介意休休然樂道忘倦曾不知老之至者夫人有以相之也夫人少孤事其母田夫人盡子道既嫁事其姑裴夫人盡婦道而所以相夫者又如此故里之人施衿結帨以訓其女必以夫人為法余氏素貧凡晨昏伏臘乃至吉凶婚娶凡資以供億者皆出於夫人處畫故其夫及子惟知專精於藝文而弗知家之有無至

於問遺親戚拊養貧族嫁遣孤女沛然若有餘力而實無旬月之積蓋其天資好德遇所當為力行之雖勞心曲體弗憚也平居與人言孜孜以和孝為本於事迎機立解分別是非利害如指白黑其居田夫人喪孺慕摧毀躬修佛事於潤之金山即夕夢田夫人乘舟而至笑語如平生識者以為孝誠所感政和二年五月十九日以疾終於家享年七十有二明年某月日葬於邑之某鄉某之原曾祖某祖某考某生六子亡者四人曰拭曰

京曰大亨曰太受而京元符三年賜進士出身存者二人曰授再薦於鄉又預大觀升貢曰為為州學內舍生女三人其壻海州沐陽縣主簿李端方進士孫堦焦翊孫五人曰似曰侑曰攸曰仍皆從學曰廉尚幼孫女五人某之先妣太淑人蔣氏裴夫人之甥也與夫人厚善相視如母子某以是知夫人之詳謹泣為之銘曰士有貴賤取之自躬嗟彼女子祇繫所從乃如夫人老於衡泌惟其為善在約彌厲宗姻尊仰匪服匪車天爵之貴

豈繫其夫善積慶貽理不終晦追賁九京予知未艾

慕容叔字墓誌銘

吾弟叔字名彥喜以元豐七年七月壬寅生於常之宜興以崇寧二年十有二月庚午終於京師以明年十有一月甲申葬於宜興篠嶺之原叔字爽俊夙晤恩性天至五歲居先考喪哀毀如成人平居奉事母兄怡聲柔色禮無違者初就外傳默識彊記閱書一再過不忘稍長益嗜學問紬繹經旨剖析疑滯出人意表善談論衮

衮不休聽者忘倦於文無所不能自進士舉業乃至應  
用詞藝落筆數千字若不經意行裕宏博不疵於理年  
甫弱冠進此方未艾也而不幸以死嗚呼哀哉天既賦  
叔孚以才矣胡嗇厥施而至斯極也維我先考養志閭  
里非義弗為非道弗取潛德卓行輝映今昔捐館之日  
以六弟付託俾某撫育訓成之諸弟嶷嶷自立講習琢  
磨芝蘭並秀當崇寧造士之盛太學選試更占殊等月  
書歲考曾靡虛籍祭酒博士相與嘉歎聞譽翕然歸之

今叔孚捨我去矣念叔孚之不壽與夫名宦猶未遂也  
某與有罪焉而理歸於無可奈何至於未克授室嗣息  
不立則某曷敢逃責言而及此摧裂肝膽嗚呼痛哉嗚  
呼痛哉謹誌

碑

故朝奉郎尚書職方員外郎通判德順軍兼管内  
勸農事輕車都尉賜緋魚袋累贈太子太師梁  
公神道碑

大觀元年正月今中書侍郎梁公初拜尚書右丞有司  
遵故事擬三世贈典以聞二月辛酉降制其略曰朕惟  
執政大臣望實顯隆致位近弼義方之訓自其前人追  
加表揚用錫休命尚書右丞子美故父某可特贈太子  
少師九月宗祀禮成又降制其略曰朕饗帝合宮翕臻  
純嘏均神之惠普逮庶工眷予近臣宜推異數追崇親  
廟實國彝章中書侍郎子美故父某可特贈太子太師  
既告第又賜子美以副焚於墓中書公拜賜泣謂某曰

子美幸承先人遺訓備位政府賴天子慶施贈官一品而墓隧之碑未立夙夜怵惕不敢怠遑惟先人出處終始之大節可考不誣敢請銘於子某義不得辭謹論次太師之官階政治而為之序曰公諱某字得之漢陵鄉侯統之後五世祖夏國公惟忠嘗任天平軍節度判官因家焉故今為郾之須城人曾祖文度贈太師中書令兼尚書令封魏國公祖顥翰林學士右諫議大夫贈太師中書令兼尚書令開府儀同三司封魏國公考適皇



祐中位宰相終太子太傅致仕贈太師中書令兼尚書  
令開府儀同三司封徐國公諡莊肅曾祖妣鄒氏韓國  
太夫人祖妣閻氏魏國太夫人妣任氏徐國太夫人公  
辭采學問在孺有聞稍長就試有司名擢高等初補將  
作監主簿累官光祿寺丞至和初仁宗皇帝嘉公故相  
子嘗舉進士召試學士院賜進士出身未幾復廷賜五  
品服遷祕書省著作佐郎自著作五遷至尚書職方員  
外郎累階朝奉郎勲輕車都尉歷監在京鑄錢務管勾

專勾同監布庫知汝州梁縣簽書天平軍節度判官事  
通判德順軍公誠信篤實常以是守身亦以是施於政  
在梁縣時郡守將闕廳事風屬邑以材木獻公曰是必  
取於民吾寧被譴豈希合以擾吾民哉卒拒之守坐法  
罷郡諸令皆得罪公獨免焉鄆視他郡為劇公裁處精  
確下無隱情民有辨訟懷牒宿留公至當職而後出蓋  
信服之若此嘗有禁卒之妻背夫以逃雖遇赦自首法  
猶不原帥吳文肅公矜之將貸以輕刑公不從立議詳

盡切於事宜文肅竦然以為正論獄既決即薦公於朝  
倉米數百萬紅腐不可給軍食安撫轉運使夏某欲亟  
以元價貸民公曰倉吏失職宜正厥罪而後減直貸之  
不然民將有辭卒用公策民輸稅於官吏不時遣因緣  
為姦部使者諉公公度弊所從起制之日入萬斛民至  
鼓舞相慶乞公在任東平監馬政廢弛朝廷遣使馳視  
公條十利以奏諸使者美之德順並邊素號難治公居  
歲餘寬猛交濟俗以綏靖創立治平城寨經始有度下

不告勞嗚呼公之為政雖古循吏何以加此昔左氏謂  
臧孫達宜有後於魯而漢史亦稱于公多陰德子孫踵  
為公卿公任不踰佐貳而奉法守公愛民澤物常不替  
於志宜流慶於今也性清謹無他嗜好獨喜為詩有集  
十卷曰汝陽雜藁研練精切真深於詩者平居陶寫情  
性風調清遠遇有所感詞氣激昂銳然有志於進為益  
稟之也全積之也厚守之也固而不克大顯於時今有  
子以儒學事業受知明天子擢為柄臣制書褒揚以為

義方之訓自其前人是豈終不顯哉公以熙寧元年十一月二十日終於德順軍之官舍享年四十有八四年九月三日葬須城登庸鄉執政里從莊肅公之兆娶張氏開封人樞密副使宏之孫少府監可道之女有賢行事舅姑以孝聞元豐元年八月六日終享年五十有六以三年二月二十六日祔於公之兆初封壽安縣君累贈嘉國太夫人子五人子駿故奉議郎子美今為太中大夫守中書侍郎子建故太常寺太祝子履今為通直

郎簽書開德府判官事子博今為通直郎通判興元府  
女二人長嫁朝奉大夫劉斐次嫁從事郎田宜孫十三  
人希祖宣義郎修祖太學上舍生承祖昭祖皆將仕郎  
求祖未仕揚祖承務郎恭祖師祖皆太廟齋郎早卒餘  
尚幼孫女十三人銘曰嗟嗟梁宗源自柏翳統侯陵鄉  
晉臣之裔維莊肅公公之皇考相我仁宗為時元老公  
生相家考翼是嗣學則通儒政則循吏帝嘉莊肅子以  
材聞給札詞禁明試以文擢踐世科揚芬桂籍佩服之

華寵有申錫公懋承之以忠以孝位雖不充志克允蹈  
德善之積慶社之詒及子而顯報施在茲制書若曰惟  
予大臣義方之訓自其前人東宮之師膺此追賚源深  
流長疏榮未艾里曰執政鄉曰登庸刻銘隧道過者改  
容

露布

擬試宏詞露布

聖人為度以天下恩靡間於華夷王者居一於域中法

尤嚴於誅賞惟彼無知之黠虜自干有赫之明威爰興  
問罪之師五道並進克殄反常之黨隻輪不還猶乾坤  
覆載之無私而春秋生殺之有序彼孽自作茲無赦於  
邦刑我伐有名蓋龔行於天討恭惟皇帝陛下掌觀萬  
國子惠庶民令出等風雷恩施同雨露接武堯舜比肩  
禹湯凡諸含血而有生孰不推心於弗忍獨拓拔之遺  
種擅呼韓之故區蟻穴至微不當國家之一縣狼心相  
繼敢肆蜂蠆者百年啖以金帛而益貪錫以土疆而愈



恣間出剽掠恬為兇殘忘涵貸之至恩逞陸梁之大慙  
人神同憤華裔弗容梟首藁街未正不庭之戮游魂蔥  
嶺尚安匪茹之居臣等材力弗彊智能無取謬當分閫  
豈縱虜以求全弗共戴天誓與賊而俱斃擁鐸號令仗  
鉞馳驅初屯橫山進薄靈武景星燭王旅天狗墮賊營  
以仁侮亡奚孤虛之足考自上伐下顧主客以何施士  
氣鼓熊羆兵威摧高岱或東衝以張我左翼或西擊以  
斷賊右肩月羽翳空霜鋒耀野魚甲粲爛獸旗攫拏伐

鼓震天揮戈迴日腹背合擊首尾分攜我師益張賊衆  
大潰僵尸滿原谷棄仗等邱山草木類人而覘虜魂驚  
風鶴有聲而奔馳足蹶六師乘銳掃瀚海之妖氛萬炬  
俱燃焚賀蘭之聚落邦封盡復民俗咸新臣等躬執干  
戈名聯士伍憑社稷無疆之慶遵廟堂必勝之謨時未  
及瓜已詠勞還之什功無橫草預聞鼓愷之音不勝慶  
快之至

欽定四庫全書

摘文堂集附錄

慕容彥逢謚議

當部准勅定謚據常州申繳到故通奉大夫守刑部尚書致仕河南縣開國伯食邑九百戶贈銀青光祿大夫慕容某行狀依例送太常寺擬謚今據回申到擬狀謚曰文友奉議郎太常博士胡交脩議曰崇寧紀元之初上方躬親聽斷勵精庶政修遵制揚功之治求賢如弗

及輔弼大臣蒐簡以副側席之求凡所薦引皆召見便  
朝天子親訪納焉時公在選中比入對論議有餘喟然  
動丹宸亟擢儒館上方欲褒顯異才以勸多士於是閱  
歲未幾不累遷遂持橐近班要途華貫翱翔殆周公感  
遇特異思竭底蘊以報眷知益自激昂以赴功名之會  
所歷咸有可紀儒學彬彬譽望蔚然為一時聞人嗚呼  
亦可尚已既終于官其家狀公行于朝命謚于太常謚  
法曰德美才脩曰文能善兄弟曰友以是易名於行不

浮請得而論之公天資穎悟人也自初就傳其默識彊  
記固已過人閱書一再過輒不忘既仕益自力於學藏  
書至數萬卷退食即研精其間自六經羣史諸子百家  
之學靡不洽通故其所蓄雄深闊博放為詞章遽然根  
柢理致代言西掖攝直北門凡所草定援筆立成溫厚  
典雅炳然可觀士大夫稱之號為近古豈不曰德美才  
修者乎公天性篤孝事繼母尤極謹順先意承志比終  
嘗如一日撫先德之遺澤抱弗洎之深悲常慨然曰獨

可致力友愛于我諸弟庶慰怵惕之思焉於是撫育訓誨誠意篤備世賞不先其息必徧同氣雖法必任子者亦力請於朝以及之吹噓汲引唯恐後用能咸被采擢華萼扶踈聯榮一時世之稱友愛者必以公為言豈唯族婣鄉里慕之縉紳之士莫不推之上至於天子亦聞而嘉獎之蓋其因心力行故久而益篤厥聞顯著如此豈不曰能善兄弟者乎考論公行被之以此謚其誰曰不宜方公居諫垣則持論堅明風望隱然貳銓曹則籍

比情例條目以絕吏姦守汝海則能以寬惠得民心長  
秋官則禁妄繫正叙法頒斷比以恢讞奏之路寬罪之  
類者以廣上恩才周於用故所居底績宜不一而已也  
若夫官師論謚獨綴取行己之善其尤較著者以垂不  
朽云謹議奉議郎守考功員外郎吳巖夫伏承太常寺  
謚議如前謹按上公天資警悟學術過人自其少時已  
能奮勵力取進士第嶄然見頭角識者固知其遠到矣  
紹聖間朝廷設宏詞以待文學之士公與同輩試于有

司一舉而得之自此名聲上達聖主銳意圖治網羅英俊用之惟恐不及公於是時首被識拔召對便殿擢寘書林更踐華要皆以才能見稱未幾進直西垣一時誥命多出其手文章典雅士夫傳播以為深得代言之體出入禁闥謀謨議論為不少矣而公慎密不泄以故罕有聞者方將進用不幸云亡此朝廷之所深惜也嗚呼公之持橐幾二十年出處進退終始之節皆可夷考至於內行修飭孝友純篤出於天性則又有不可掩者世



賞必先同氣而不以私其子撫育教誨迄用有成數年  
之間諸弟繼踵登朝寢以光顯矣然猶分俸祿以給其  
不足此又人之所難縉紳之論莫不以此多之天子亦  
聞而稱獎焉身歿之後室無私藏聖恩矜恤隱終之典  
於數尤縉太常參稽衆論請以文友二字謚公之名名  
稱其實不為虛矣當部准例於都省集合省官同參詳  
皆協令式請有司准例施行謹詳定訖遂具狀申都省  
取裁奉太宰判准謹具申都省伏候指揮勅旨仍付所

司宣和二年二月二十三日奉勅如右牒到奉行宣和  
二年二月二十四日尚書吏部故通奉大夫守刑部尚  
書致仕河南縣開國伯食邑九百戶贈銀青光祿大夫  
慕容某謚曰文友牒奉勅牒至准勅故牒宣和二年三  
月日書令史武統給考功員外郎吳巖夫考功員外郎  
黃叔教侍郎王鼎侍郎盧法原尚書蔣猷

慕容彥逢墓誌銘

中大夫充徽猷閣待制提舉南京鴻慶宮蔣璿撰

政和七年夏五月通議大夫刑部尚書慕容公疾病拜  
疏上還印綬天子閔以職事勤公詔以通奉大夫刑部  
尚書致仕是月壬子薨于寢享年五十有一上聞震悼  
制贈銀青光祿大夫賙賻加等又以御府錢二百萬賜  
其家宣和元年二月甲申葬于常州宜興縣篠嶺之原  
公諱某某字其先曹魏時建國為率義王歷晉隋唐世  
有顯人五代時開州刺史贈太保某於公為四世祖太  
保二子長曰某國初以功封河南王季曰某為磁州刺

史生右衛將軍諱某家于滏陽隨子官宜興卒葬焉故  
今為宜興人右衛生少師諱某於公為考少師三娶周  
氏沈氏蔣氏累贈崇榮嘉國太夫人公沈出也幼卓偉  
不羣六歲喪母哀毀如成人默識彊記讀書一再過輒  
不忘常有異人語少師曰是兒手有從理足有二黑子  
他日必貴視之信然初未之見也少長銳志於學痛自  
砥礪窮經綴文不少懈出與諸儒試常為魁首弱冠登  
元祐三年進士第調主池州銅陵簿比少師捐館舍公

承訃號絕哀感行路卒喪調主婺州金華簿改瀛州防禦推官知鄂崇陽縣會朝廷初設宏詞科以羅天下文學之士公從試中之遷淮南節度推官越州州學教授推所以教諸生孜孜不倦南方士喟然興於學益繕治黌舍刊印三史讐校精審遂為善書四方士大夫購求之鬻以養士迨今蒙利焉元符元年改宣德郎擢主國子監簿遷太學博士崇寧初元賜對便殿敷納明辨方秋試進士公建言以為邇來學者程文往往尚浮靡畔

經術願詔有司凡選擇務先理致後文采詭僻不醇者  
黜之詔從其請除秘書省校書郎未幾擢監察御史兼  
權殿中侍御史燕見一再上益才之除左正言遷左司  
諫章數十上大抵以拾遺補闕輔教化慎命令為先劾  
按權近無所回撓後言執政以某事當去上亟為罷之  
論議堅正風望隱然除起居舍人踰月召試制誥擢中  
書舍人預編修哲宗皇帝御集三年春罹嘉國夫人憂  
初夫人寢疾公憂見顏間扶承左右殆廢寢食及執喪

毀瘠踰制三年不居於內芝草產廬次鄉里歌頌之服  
闕洊拜中書舍人大觀元年春權翰林學士歲中除尚  
書兵部侍郎數月改吏部建請編次差擬近比為書以  
窒欺謾下諸郡審覈圭田有無多寡之實簿正之又為  
薦舉都簿具注薦士之章毋得隱漏典選凡三年條教  
張設鉗梏吏奸縉紳大悅便之進兼侍讀又兼議禮武  
選詳議官前所論執政復登用言官希意誣公以他事  
朝論不以為然上亦察其無他趣令眎職而公力請補

外遂出知汝州布宣德意加以廉平民有犯法必求所以寬之罪疑者從輕故下德其賜至相約不犯公令既去而思之不忘尋加集賢殿修撰政和元年復以吏部侍郎召兼侍講并議禮局二年冬擢拜刑部尚書公平日以文學進法律非所習人或難之公曰三尺安出哉顧患不留意爾凡有參決必本於法令而緣飾以儒雅故爰書論報當於理合人心建請開封府捕盜官與緝事使臣敢捕繫無罪人詣吏者並比附政和法縣以杖



笞及無罪人為徒以上罪送州杖一百自是吏知畏憚不敢妄捕繫人又論命官員罪除名為重追官為輕而刑部叙法除名人初犯私坐乃除一官叙公坐盡叙舊官而追官者皆除所追官叙輕重不倫願詔有司詳定復請下大理取熙寧以來四方奏讞情法疑憫決事比頒之天下庶幾遠方知所遵用詔皆從之每決四方疑獄必從輕比多所未宥故奏牘之上司寇者屢以罄絕稱慶于朝兼詳定高麗入貢法六年復知貢舉公自崇

寧以來五司文衡一時俊傑多出其門進兼太子賓客  
上初建儲貳以重國本東宮寮寀極當時之選公以宿  
德鉅儒與今丞相白公偕被差擇朝野稱得人既職調  
護五日一見皇太子必力陳父子君臣之道如是而為  
孝如是而為忠惓惓輔道開益居多歲中頻攝翰林學  
士自居從官凡翰苑缺員輒被旨兼領所草內制自成  
一集公久服邇聯譽望隆洽忠誼謀謨上所深知天下  
士指日以冀柄任而平時盛氣揚休未嘗有疾七年仲

夏侍祠方澤適隆暑禮成而退體中覺疲勩猶力于朝  
謁告纔數日遂不起病不登三事遠圖弗究豈命也夫  
將歸葬詔以季弟開封府刑曹掾彥季通判常州典護  
終事長弟彥許自開封府刑曹仲弟彥傳自太常寺丞  
亦皆請外同護喪而歸從官舉故事賦斂賻送合數十  
百萬公子攀棺號慟曰義不傷先人名卒辭不受公孝  
友蓋天性非彊勉致然事繼母盡禮既處顯矣致養怡  
謹如布衣時友愛三弟所以撫育教誨之甚至稍長進

之於學講習琢磨以身率之其後羣處太學皆聲聲為  
名進士延賞不先與子必徧逮同氣吹噓汲引例被除  
擢當時貴之其論撰集賢也法得任子不許及旁其時  
仲弟未命公慨然曰吾子可先吾弟官乎乃以至誠祈  
懇朝廷多公義特從之自貧約時與諸弟飲食衣服必  
均絕甘分少迨貴猶然每休沐朝直退必相與論文義  
或把酒燕衎窮日夜無厭數暫不見即惘惘若有所失  
彥許初除天府刑曹公以職事對因辭謝上存慰勤至

問及兄弟之數且曰卿之孝友朕固知之聚族千指調  
餽輯睦中外無間言京城無宅以居僦舍卑陋處之裕  
如也幼女與孤甥女皆擇命士之賢者歸之齋裝周渥  
不異己子居家不問有無祿賜所得不給於用妻子衣  
食纔足而已既歿家無餘貲天子亦知之故能賚賜特  
厚及葬狀公之行治上太常太常議曰謚法德美才修  
曰文能善兄弟曰友今其狀應法乃謚曰文友公之節  
惠可以無愧矣為人敦大靜重啟處有常不妄笑語雖

家人子弟不見其喜愠御下以寬不與物忤人犯之不校也言官誣公者既死其猶子坐殺人州以具獄上刑部人為危之公平心論決卒傳生議論者伏公能損怨起家單平被遇明主列於侍從十有五年初無左右之助小心兢畏以義命自安無所附麗非公事未嘗請對天子思見公至被命乃敢請問自幼嗜學問晚節益篤藏書數萬卷朝夕繙閱不去手自經史諸子百家之言靡不洽通故其所蓄渾雄深博發為詞章雅麗簡古無

世俗氣尤長於辭令典嚴溫厚褒貶無溢言詔命或叢  
委操筆立成初若不經意而輕重適當文采繁然每一  
篇出多士口傳以熟上尤愛公文以為有古風進見往  
往摘訓辭之善者稱賞之有文集二十卷外制二十卷  
內制十卷奏議五卷講解五卷藏于家公官階自宣德  
郎十四遷至通奉大夫開國自河南縣男至伯食邑自  
三百戶至九百戶娶葛氏故贈少保某之女封衛國太  
夫人賢明淑貞治家有法度二男邦佐承議郎行太府

寺丞有美才所居官能舉其職邦用承事郎三女長歸  
余之子寧祖季歸余之子及祖仲適朝散郎尚書戶部  
侍郎賈安宅孫男九人曰綱承事郎曰紹曰絢皆通仕  
郎曰綸曰約曰繪曰縉曰絳曰純皆將仕郎孫女四人  
長適文林郎賈巽次適從政郎任仲恕餘尚幼既葬邦  
佐以門人之狀與太常之議見示泣且言曰先人葬宜  
有銘願以累公余與公居同鄉進同年仕同寮有游從  
之好有姻婭之契知公為詳義不得辭也乃為之銘曰



棘成之裔世雄朔鄙魏征海邦率義始王國初建功亦  
享王封乃及其胄右衛之崇維祖維考埋光弗耀是  
生河南盛德之報道隆以廣學博而與逢時之休橫厲  
遠趨騫于禁密以職華要筆舌之峻調護之尊豈曰不  
貴公志未伸胡弗壽考俾秉國均維皇是悼喪我良臣  
有蘊弗攄亦燾後昆謚以易名萬世是信篠嶺戕戕荆  
水沄沄既固既安曰公之墳

